

四庫全書

集部

欽定四庫全書

唐詩鏡卷十

明 陸時雍 編

盛唐第二

王維

文苑傳云字摩詰太原人父徙家於蒲遂為河東人開元九年擢進士第一與弟縉齊名天寶中歷

官給事中

祿山陷兩都為賊所得服藥佯瘖賊平定

罪以凝碧池詩聞于行在特宥之官至尚書右丞尤

長五言詩書畫特臻其妙兄弟俱好奉佛乾元二年

卒代宗索其樂章弟縉編綴四百餘篇上之集異

記云維年未弱冠文章得名性開音律岐王使為伶

人齋琵琶引至公主第令獨奏新曲號鬱輪袍公主

大奇之雄出獻懷中詩公主驚駭曰皆我素所誦習
常謂古人佳作乃子為之乎因命更衣升之客右召
試官至第遣宮婢傳教作解頭登第

王摩詰語多妙會相出天成境到神流難以力與
也古詩如輕紅淺碧律詩如翡翠珊瑚此其材
之有限詩家各有一種真氣磨滅不盡摩詰似
較少李太白亦不多見五言古時時有之以此知
陶謝之美

五言古詩

贈裴迪

不相見不相見來久日日泉水頭常憶同攜手攜手本

同心復歎忽分襟相憶今如此相思深不深

語淺
情深

奉寄韋太守陟

荒城自蕭索萬里山河空天高秋日迴嘹唳聞歸鴻寒
塘映衰草高館落疎桐臨此歲方晏顧景詠悲翁故人
不可見寂寞平陵東

疎
冷

秋夜獨坐懷內弟崔興宗

夜靜羣動息
蟋蟀聲悠悠
庭槐北風響
日夕方高秋
思子整羽翰
及時當雲浮
吾生將白首
歲晏思滄洲
高足在旦暮
肯為南畝儔

起語清寂
彷彿何遜

送別

下馬飲君酒
問君何所之
君言不得意
歸卧南山陲
但去莫復問
白雲無盡時

悠然
自遠

送韋大夫東京留守

人外遺世慮空端結遐心曾是巢許淺始知堯舜深蒼
生詎有物黃屋如喬林上德撫神運沖和穆宸襟雲雷
康屯難江海遂飛沈天工寄人英龍袞瞻君臨名器苟
不假保釐固其任素質貫方領清景照華簪慷慨念王
室從容獻官箴雲旗蔽三川畫角發龍吟晨揚天漢聲
夕卷大河陰窮久業已寧逆虜遺之擒然後解金組拂
衣東山岑給事黃門省秋光正沈沈功名與身退老病

隨年侵君子從相訪重玄其可尋

快心
語

別弟縉後登青龍寺望藍田山

陌上新別離蒼茫四郊晦登高不見君故人復雲外遠
樹蔽行人長天隱秋塞心悲宦遊子何處飛征蓋

三四無
心佳句

藍田山石門精舍

落日山水好漾舟信歸風探奇不覺遠因以緣源窮遙

愛雲木秀初疑路不同
安知清流轉偶與前山通
捨舟理輕策果然愜所適
老僧四五人逍遙蔭松柏
朝梵林未曙夜禪山更寂
道心及牧童世事問樵客
暝宿長林下焚香卧瑶席
澗芳襲人衣山月映石壁
再尋畏迷誤明發更登歷
笑謝桃源人花紅復來覲

語語
領趣

青谿

言入黃花川每逐青谿水
隨山將萬轉趣途無百里
聲

喧亂石中色靜深松裏漾漾汎菱荇澄澄映葭葦我心
素已閒清川澹如此請留磐石上垂釣將已矣

快

崔濮陽兄季重前山興

山西去亦
對維門

秋色有佳興況君池上閒悠悠西林下自識門前山千
里橫黛色數峯出雲間嵯峨對秦國合沓藏荆關殘雨
斜日照夕嵐飛鳥還故人今尚爾歎息此顏顏

秋色瀟灑語雖
淺淺却有真趣

李處士山居

李一作石

君子盈天階小人甘自免方隨鍊金客林上家絕巘背
嶺花未開入雲樹深淺清晝猶自眠山鳥時一轉

丁寓田家有贈

君心尚棲隱久欲傍歸路在朝每為言解印果成趣晨
雞鳴鄰里羣動從所務農夫行餉田閨妾起縫素開軒
御衣服散帙理章句時吟招隱詩或製閒居賦新晴望
郊郭日映桑榆暮陰盡小苑城微明渭川樹揆予宅閭

井幽賞何由屢道存終不忘迹異難相遇此時惜離別
再來芳菲度

不作寒
倫故佳

渭川田家

斜光照墟落窮巷牛羊歸野老念牧童倚仗候荆扉雉
雛麥苗秀蠶眠桑葉稀田夫荷鋤至相見語依依即此
羨閒逸悵然吟式微

景色
依然

春中田園作

屋上春鳩鳴村邊杏花白
持斧伐遠揚荷鋤覘泉脈
歸燕識故巢舊人看新歷
臨觴忽不御惆悵遠行客

野趣

過李揖宅

閒門秋草色終日無車馬
客來深巷中犬吠寒林下
散髮時未簪道書行尚把
與我同心人樂道安貧者
一罷宜城酌還歸洛陽社

自在處可托
陶家字下

七言古詩

夷門歌

七雄雄雌猶未分攻城殺將何紛紛秦兵益圍邯鄲急
魏王不救平原君公子為嬴停駟馬執轡愈恭意愈下
亥為屠肆鼓刀人嬴乃夷門抱關者非但慷慨獻奇謀
意氣兼將身命酬向風刎頸送公子七十老翁何所求

末句懷
抱如洗

不遇詠

北闕獻書寢不報
南山種田時不登
百人會中身不預
五侯門前心不能
身投河朔飲君酒
家在茂陵平安否
且此登山復臨水
莫問春風動楊柳
今人作人多自私
我心不說君應知
濟人然後拂衣去
肯作徒爾一男兒

快
小結
作淺著色

新秦郡松樹歌

青青山上松
數里不見今更逢
不見君心相憶此心向

君君應識為君顏色高且閒亭亭迴出浮雲間

答張五弟

終南有茅屋前對終南山終年無客常閉關終日無心
長自閒不妨飲酒復垂釣君但能來相往還

語趣
清絕

送李睢陽

將置酒思悲翁使君去出城東麥漸漸雉子斑槐陰陰
到潼關騎連連車遲遲車遲遲心中悲宋又遠周間之

南淮夷東齊兒碎碎織練與素絲遊人賈客信難持五
穀前熟方可為下車閉閣君當思天子當殿儼衣裳太
官尚食陳羽觴彤庭散綬垂鳴璫黃紙詔書出東廂輕
紈疊綺爛生光宗室子弟君最賢分憂當為百辟先布
衣一言相為死何況聖主恩如天鸞聲噦噦魯侯旂明
年上計朝京師須憶今日斗酒別慎勿富貴忘我為

體雜
歌騷

魚山神女祠歌二首

迎神曲

坎坎擊鼓魚山之下吹洞簫望極浦女巫進紛屢舞陳
瑶席湛清醕風淒淒兮夜雨神之來兮不來使我心兮
苦復苦

送神曲

紛進拜兮堂前目眷眷兮瓊筵來不語兮意不傳作暮
雨兮愁空山悲急管思繁絃靈之駕兮儼欲旋倏雲收
兮雨歇山青青兮水潺潺

短簫絕浦
清響澆澆

黃雀癡

黃雀癡黃雀癡謂言青鵲是我兒一一口銜食養得成
毛衣到大啁啾解游颺各自東西南北飛薄暮空巢上
羈雌獨自歸鳳凰九雛亦如此慎莫愁思顛顛損容輝
白龜過

南山之瀑水兮激石湍瀑似雷驚人相對兮不聞語聲
翻渦跳沫兮蒼苔濕蘚老且厚春草為之不生獸不敢

驚動鳥不敢飛鳴白黿渦濤戲瀨兮委身以縱橫主人之仁兮不網不釣得遂性以生成

五言律詩

早朝

柳暗百花明春深五鳳城城烏睥睨曉宮井轆轤聲方朔金門侍班姬玉輦迎仍聞遣方士東海訪蓬瀛

從岐王過楊氏別業應教

楊子談經處淮王載酒過興闌啼鳥緩坐久落花多逕

轉迴銀燭林開散玉珂
嚴城時未啓前路擁笙歌

坐久落花多意景適會
王摩詰詩著意
著色不入金玉綺羅別是林壑雲霞之氣

同崔員外秋宵寓直

建禮高秋夜承明候曉過九門寒漏徹萬井曙鐘多月
迴藏珠斗雲消出絳河更慙衰朽質南陌共鳴珂

五六
句琢

輞川閒居贈裴秀才迪

寒山轉蒼翠秋水日潺湲倚杖柴門外臨風聽暮蟬渡

頭餘落日墟里上孤煙復值接輿醉狂歌五柳前

三四意態猶夷五六佳在布景不在屬詞又輞川閒居時倚檐前樹遠看原上村語似遜此

冬晚對雪憶胡居士家

寒更傳曉箭清鏡覽衰顏隔牖風驚竹開門雪滿山灑
空深巷靜積素廣庭閒借問袁安舍脩然尚閉關

三四
自在

酬比部楊員外暮宿琴臺朝躋書閣率爾見贈
之作

舊簡拂塵看鳴琴候月彈桃源迷漢姓松樹有秦官空

谷歸人少青山背日寒羨君棲隱處遙望白雲端

松樹一作

松逕逕字佳樹字嫌於太通

三四意境之妙大畧意境既成則神色自傳聲調即不煩而合矣此第一上流

酬張少府

晚年唯好靜萬事不關心自顧無長策空知返舊林松風吹解帶山月照彈琴君問窮通理漁歌入浦深

送丘為落第歸江東

憐君不得意況復柳條春為客黃金盡還家白髮新五
湖三畝宅萬里一歸人知爾不能薦羞稱獻納臣

稍近銷削開
中唐之漸

送李判官赴東江

聞道皇華使方隨阜蓋臣封章通左語冠冕化文身樹
色分揚子潮聲滿富春遙知辨璧吏恩到泣珠人

送丘為往唐州

宛洛有風塵君行多苦辛四愁連漢水百口寄隨人槐

色陰清畫楊花惹暮春朝端肯相送天子繡衣臣

三四亦削惹字即
事生愁是煩究語

送平澹然判官

不識陽關路新從定遠侯黃雲斷春色畫角起邊愁瀚
海經年到交河出塞流須令外國使知飲月氏頭

三四意象深露自然入妙所以為佳若刻之使深
逼之使露則有傷根動窟之病縱有佳句精彩薄
而氣象淺矣樹之可觀者在花人之可觀者在
面詩之可觀者意象之間而已要在精神滿而色
澤生非必求之
隱深之內也

送劉司直赴安西

絕域陽關道胡沙與塞塵三春時有鴈萬里少行人
苜蓿隨天馬葡萄逐漢臣當令外國懼不敢覓和親

三四清

警自在

送趙都督赴代州得青字

天官動將星漢上柳條青萬里鳴刁斗三軍出井陘
忘身辭鳳闕報國取龍庭宣學書生輩牕間老一經

送梓州李使君

萬壑樹參天，千山響杜鵑。
山中一夜雨，樹杪百重泉。
漢女輸幢布，巴人訟芋田。
文翁翻教授，不敢倚先賢。

三四
是山中人
得景深後語

送楊長史赴果州

褒斜不容幘，之子去何之。
鳥道一千里，猿聲十二時。
官橋祭酒客，山木女郎祠。
別後同明月，君應聽子規。

三四
清絕

送邢桂州

錢吹喧京口風波下洞庭
赭圻將赤岸擊汰復揚舲
日落江湖白潮來天地青
明珠歸合浦應逐使臣星

送崔三往密州觀省

南陌去悠悠東郊不少留
同懷扇枕戀獨念倚門愁
路遠天山雪家臨海樹秋
魯連功未報且莫蹈滄洲

過香積寺

不知香積寺數里入雲峯
古木無人徑深山何處鐘
泉聲咽危石日色冷青松
薄暮空潭曲安禪制毒龍

韻氣冷甚 三四
偷律病在不嚴

晚春嚴少尹與諸公見過

松菊荒三逕圖書共五車
烹葵邀上客看竹到貧家
鵲乳先春草鶯啼過落花
自憐黃髮暮一倍惜年華

三四精雅五
六語韻恬適

山居秋暝

空山新雨後天氣晚來秋
明月松間照清泉石上流
竹喧歸浣女蓮動下漁舟
隨意春芳歇王孫自可留

三四
冷然

終南別業

中歲頗好道晚家南山陲興來每獨往勝事空自知行
到水窮處坐看雲起時偶然值林叟談笑無還期

五六
神境

韋給事山居

幽尋得此地詎有一人曾大壑隨階轉羣山入戶登庖
厨出深竹印綬隔垂藤即事辭軒冕誰云病未能

三四景

色入手

山居即事

寂寞掩柴扉
蒼茫對落暉
鶴巢松樹遍
人訪葦門稀
綠竹含新粉
紅蓮落故衣
渡頭煙火起
處處采菱歸

三四幽境自成閒然清遠

終南山

太乙近天都
連山到海隅
白雲迴望合
青靄入看無
分野中峯變
陰晴衆壑殊
欲投人處宿
宿隔水問樵夫

陰晴衆壑殊一語蒼然入雅江流天地外山色有
無中宋人深賞此二語余謂江流天地外此是漫
語山色有無中
此語亦落小乘

春園即事

宿雨乘輕屐春寒著敝袍開畦分白水間柳發紅桃草
際成棊局林端舉桔槔還持鹿皮几日暮隱蓬蒿

五六語入繪筆凡隨事可文隨象可畫隨景可賦
便是會到至處因思隨事可做隨人可處信非至
人不
能

觀獵

風勁角弓鳴將軍獵渭城草枯鷹眼疾雪盡馬蹄輕忽
過新豐市還歸細柳營迴看射雕處千里暮雲平

會境入神老杜謂意愜關飛動以此風勁角弓
鳴他人得此仗作一聯早朝起句柳暗百花明亦
然長材縮用大家往往有之
三四體物微妙結語入畫

使至塞上

單車欲問邊屬國過居延征蓬出漢塞歸鴈入胡天大
漠孤煙直長河落日圓蕭關逢候吏都護在燕然

五六得景在日圓二字是
為不琢而佳得意象故

秋夜獨坐

獨坐悲雙鬢空堂欲二更
雨中山果落燈下草蟲鳴
白髮終難變黃金不可成
欲知除老病唯有學無生

三四
輕便

附歸嵩山作
清川帶長薄車馬去閒閒
流水如有意暮禽相與還
荒城臨古渡落日滿秋山
迢遞嵩高下歸來且閉關

附輞川閒居
一從歸白社不復到青門
時倚檐前樹遠看原上村
青菰臨水映白鳥向山翻
寂寞於陵子桔槔方灌園

漢江臨汎

楚塞三湘接荆門九派通江流天地外山色有無中郡
邑浮前浦波瀾動遠空襄陽好風日留醉與山翁

汎前陂

秋空自明迴汎復遠人間暢以沙際鶴兼之雲外山澄
波澹將夕清月皓方閒此夜任孤棹夷猶殊未還

此律中

變調

遊李山人所居因題屋壁

人事皆如夢狂來或自歌問年松樹老有地竹林多藥
倩韓康賣門容尚子過翻嫌枕席上無那白雲何

登辨覺寺

竹徑從初地蓮峯出化城牕中三楚盡林上九江平軟
草承趺坐長松響梵聲空居法雲外觀世得無生

黎拾遺昕裴秀才迪見過秋夜對雨之作

促織鳴已急輕衣行向重寒燈坐高館秋雨聞疎鐘白
法調狂象玄言問老龍何人顧蓬徑空愧求羊蹤

慕容承攜素饌見過

紗帽烏皮几閒居懶賦詩門看五柳識年算六身知靈
壽君王賜彫胡弟子炊空勞酒食饌持底解人頤

七言律詩

奉和聖製從蓬萊向興慶閣道中留春雨中春
望之作應制

渭水自縈秦塞曲黃山舊遶漢宮斜鑿輿迴出仙門柳
閣道迴看上苑花雲裏帝城雙鳳闕雨中春樹萬人家

為乘陽氣行時令不是宸遊翫物華

前四語布景畧盡五六著色點染一一俱工佳
在寓題流動分外神色自饒摩詰七律與杜少
陵爭馳杜好虛摹吞吐含情神行象外王用
實寫神色冥會意妙言先二者誰可軒輊

大同殿柱產玉芝龍池上有慶雲神光照殿百

官共覩聖恩便賜宴樂敢書即事

欲笑周文歌宴鎬遙輕漢武樂橫汾
宣如玉殿生三秀詎有銅池出五雲
陌上堯樽傾北斗樓前舜樂動南薰
共歡天意同人意萬歲千秋奉聖君

輕輕排疊
得不犯手

敕賜百官櫻桃

芙蓉闕下會千官
紫禁朱櫻出上闌
纔是寢園春薦後
非闌御苑鳥銜殘
歸鞍競帶青絲籠
中使頻傾赤玉盤
飽食不須愁內熱
大官還有蔗漿寒

中聯寫
得宛至

和賈舍人早朝大明宮之作

絳幘雞人報曉籌
尚衣方進翠雲裘
九天闔闔開宮殿

萬國衣冠拜冕旒日色纔臨仙掌動香煙欲傍袞龍浮
朝罷須裁五色詔珮聲歸到鳳池頭

三四
冠冕

和太常韋主簿五郎溫湯寓目之作

漢主離宮接露臺秦川一半夕陽開青山盡是朱旗繞
碧澗翻從玉殿來新豐樹裏行人度小苑城邊獵騎迴
聞道甘泉能獻賦懸知獨有子雲才

前四語極宮殿羽儀之盛隱
帶諷情五六景色妙入繪筆

酬郭給事

洞門高閣靄餘輝
桃李陰陰柳絮飛
禁裏疎鐘官舍晚
省中啼鳥吏人稀
晨搖玉珮趨金殿
夕奉天書拜瑣闥
強欲從君無那老
將因卧病解朝衣

三四不
妨清老

出塞作

居延城外獵天驕
白草連山野火燒
暮雲空磧時驅馬
秋日平原好射鵰
護羌校尉朝乘障
破虜將軍夜渡遼

玉靽角弓珠勒馬漢家將賜霍嫖姚

三四妙得景色極其雄渾而不見雄渾之迹詩至雄渾而不肥清瘦而不削斯為至矣詩以自然合道為宗聲色不動為美此道始自三百非初說也詩即人之言也言必字字而雕之句句而繪之即聞者駭矣七言之佳者始自燕歌行其後張正見有流螢映月明空帳衰柳隨風入斷機江總有風高暗綠凋殘柳雨駛芳紅濕晚芙蓉煬帝有綠潭桂楫浮青雀果下金鞍躍紫騮入唐杜審言有梅花落處疑殘雪柳葉開時任好風沈佺期有九月寒砧催落木十年征戍憶遼陽蘇頌有雲山一一看皆好竹石蕭蕭畫不成王維有暮雲空磧時驅馬秋日平原好射雕皆標格渾成意象圓美恐杜少陵不得擅美於唐也

送楊少府貶郴州

明到衡山與洞庭若為秋月聽猿聲愁看北渚三湘遠
惡說南風五兩輕青草瘴時過夏口白頭浪裏出湓城
長沙不久留才子賈誼何須弔屈平

五六語非漫下正是別情種處氣自項聯貫下
與黃河磧裏沙為岸白馬津邊柳向城者自別

過乘如禪師蕭居士嵩丘蘭若

無著天親弟與兄嵩丘蘭若一峯晴食隨鳴磬巢鳥下
行踏空林落葉聲迸水定侵香案濕雨花應共石牀平

深洞長松何所有儼然天竺古先生

三四清真
絕去色相

春日與裴迪過新昌里訪呂逸人不遇

桃源一向絕風塵
柳市南頭訪隱淪
到門不敢題凡鳥
看竹何須問主人
城上青山如屋裏
東家流水入西鄰
閉戶著書多歲月
種松皆作老龍鱗

看竹何須問主人
儵然雅意五六全
入畫意正是於不遇時徘徊瞻顧景象

酌酒與裴迪

酌酒與君君自寬
人情翻覆似波瀾
白首相知猶按劍
朱門先達笑彈冠
草色全經細雨濕
花枝欲動春風寒
世事浮雲何足問
不如高卧且加餐

五六清健氣格不衰王元美以高岑同論非也王
俱當行本色高岑借景生情相去甚遠後人因絕
愛少陵遂至
忽視摩詰耳

積雨輞川莊作

積雨空林煙火遲
蒸藜炊黍餉東菑
漠漠水田飛白鷺
陰陰夏木轉黃鸝
山中習靜觀朝槿
松下清齋折露葵

野老與人爭席罷海鷗何事更相疑

語氣
殊靜

附重酬范郎中何幸含香奉至尊多慙未報主人恩
草木盡能酬雨露榮枯安敢問乾坤僊郎有意憐
同舍丞相無私斷掃門揚子解嘲徒自遣馮唐已老復何論

附早秋山中作無才不敢累明時思向東谿守故
籬豈厭尚平婚嫁早却嫌陶令去官遲草間蛩響臨
秋急山裏蟬聲薄暮悲寂寞柴門人不空
林獨與白雲期

五言排律

奉和聖製暮春送朝集使歸郡應制

萬國仰宗周衣冠拜冕旒玉來迎大客金節送諸侯祖
席傾三省褰帷向九州楊花飛上路槐色蔭通溝來預
釣天樂歸分漢主憂宸章類河漢垂象滿中州

春日直門下省早朝

騎省直明光雞鳴謁建章遙聞侍中珮閣識令君香玉
漏隨銅史天書拜夕郎旌旗映閭闔闔闔歌吹滿昭陽官舍
梅初紫宮門柳欲黃願將遲日意同與聖恩長

送秘書晁監還日本國 并序

舜觀羣后有苗不格禹會諸侯防風後至動干戚之
舞興斧鉞之誅乃貢九牧之金始頒五瑞之玉我開
元天地大寶聖文神武應道皇帝大道之行先天布
化乾元廣運涵育無垠若華為東道之標戴勝為西
門之候豈甘心於筇杖非徵貢於包茅亦由呼邪來
朝舍於蒲萄之館卑彌遣使報以蛟龍之錦犧牲玉
帛以將厚意服食器用不寶遠物百神受職五老告
期況乎戴髮含齒得不稽顙屈膝海東國日本為大

服聖人之訓有君子之風正朔本乎夏時衣裳同乎
漢制歷歲方達繼舊好於行人滔天無涯貢方物於
天子同儀加等位在王侯之先掌次改觀不居蠻夷
之邸我無爾詐爾無我虞彼以好來廢關弛禁上敷
文教虛至實歸故人民雜居往來如市晁司馬結髮
遊聖負笈辭親問禮於老聃學詩於子夏魯借車馬
孔丘遂適於宗周鄭獻縞衣季札始通於上國名成
太學官至客卿必齊之姜不歸娶於高國在楚猶晉

亦何獨於由余遊宦三年願以君羹遺母不居一國
欲其畫錦還鄉莊舄既顯而思歸闕羽報恩而終去
於是稽首北闕裹足東轅篋命賜之衣懷敬問之詔
金簡玉字傳道經於絕域之人方鼎彝搏致分器於
異姓之國琅瑯臺上迴望龍門碣石館前曼然鳥逝
鯨魚噴浪則萬里倒迴鷄首乘雲則八風卻走扶桑
若薺鬱島如萍沃白日而簸三山浮蒼天而吞九域
黃雀之風動地黑蜃之氣成雲森不知其所之何相

思之可寄嘻去帝鄉之故舊謁本朝之君臣詠七子
之詩佩兩國之印恢我王度諭彼蕃臣三寸猶在樂
毅辭燕而未老十年在外信陵歸魏而逾尊子其行
乎余贈言者

積水不可極安知滄海東九州何處遠萬里若乘空向
國唯看日歸帆但信風鰲身映天黑魚眼射波紅鄉樹
扶桑外主人孤島中別離方異域音信若為通

姚合極
玄集以

此篇
壓卷

此詩祇語語的當
謂之壓卷非也

五言絕句

班婕妤

玉牕螢影度金殿人聲絕
秋夜守羅帷孤燈耿不滅
恠來妝閣閉朝下不相迎
總向春園裏花間笑語聲

孟城坳

新家孟城口古木餘衰柳
來者復為誰空悲昔人有

倒折
簡而深

文杏館

文杏裁為梁，香茅結為宇。不知棟裏雲，去作人間雨。

妙境

鹿柴

柴土邁切按韻會云山居以木柵作砦或作柴

空山不見人，但聞人語響。返景入深林，復照青苔上。

古而幽

臨湖亭

輕舸迎上客，悠悠湖上來。當軒對樽酒，四面芙蓉開。

末句
景好

藥家瀨

颯颯秋雨中淺淺石溜瀉跳波自相濺白鷺鷺復下

古
趣

白石灘

清淺白石灘綠蒲向堪把家住水東西浣紗明月下

竹里館

獨坐幽篁裏彈琴復長嘯深林人不知明月來相照

辛夷塢

木末芙蓉花山中發紅萼澗戶寂無人紛紛開且落

鸕鷀堰

乍向紅蓮沒復出清蒲颺獨立何離襪銜魚古查上

臨高臺送黎拾遺

相送臨高臺川原杳何極日暮飛鳥還行人去不息

雜詩

家住孟津河門對孟津口常有江南船寄書家中否

君自故鄉來應知故鄉事來日綺牕前寒梅著花未
已見寒梅發復聞啼鳥聲愁心視春草畏向堦前生

崔興宗寫真詠

畫君年少時如今君已老今時新識人知君舊時好

雋

六言絕句

田園樂

萋萋春草秋綠落落長松夏寒牛羊自歸村巷童稚不

識衣冠

桃紅復含宿雨柳綠更帶朝煙花落家僮未掃鶯啼山
客猶眠

七言絕句

少年行

新豐美酒斗十千咸陽遊俠多少年相逢意氣為君飲
繫馬高樓垂柳邊

末句
意氣

送元二使安西

渭城朝雨裊輕塵，客舍青青柳色新。
勸君更盡一杯酒，西出陽關無故人。

西出陽關無故人

語老情深遂為千古絕調如岑參送殷寅清淮無
底綠江深宿處津亭楓樹林駟馬欲辭丞相府一
樽須盡故人心同此一意相
去遠矣故詩以老鍊為佳

齊州送祖二

送君南浦淚如絲，君向東州使我悲。
為報故人顙顙盡，如今不似洛陽時。

淒婉劉夢
得同調

送韋評事

欲逐將軍取右賢
沙場走馬向居延
遙知漢使蕭關外
愁見孤城落日邊

意外
含情

與盧員外象過崔處士興宗林亭

綠樹重陰蓋四鄰
青苔日厚自無塵
科頭箕踞長松下
白眼看他世上人

金匱要略卷十
寒食汜上作

廣武城邊逢暮春
汶陽歸客淚沾巾
落花寂寂啼山鳥
楊柳青青渡水人

戲題輞川別業

柳條拂地不須折
松樹披雲從更長
藤花欲暗藏獠子
柏葉初齊養麝香

幽景

菩提寺禁裴迪來相看
說逆賊等凝碧池上作

音樂供奉人等舉聲便一時淚下私成口號

誦示裴迪

紀事云祿山大會凝碧池梨園子弟歎歔泣下樂工雷海青擲樂器西向大慟賊支解於試馬殿維時拘於菩提寺有詩云云後聞行在賊平昏下獄獨維得免

萬戶傷心生野煙百官何日更朝天
秋槐葉落空宮裏凝碧池頭奏管絃

景中情

附歎白髮宿昔朱顏成暮齒
須臾白髮變垂髫一生幾許傷心事
不向空門何處銷意非似摩詰語

唐詩鏡卷十

欽定四庫全書

唐詩鏡卷十一

明 陸時雍 編

盛唐第三

王縉

本傳云字夏卿河中人與兄維早以文翰著名連應草澤文辭清麗舉累授侍御史祿山亂為太原

少尹功效謀略衆所推先加憲部侍郎歷工部侍郎散騎常侍廣德中拜黃門侍郎同平章事後以元載得罪坐貶括州刺史大厯中除太子賓客留司東都卒

七言絕句

與盧員外象過崔處士興宗林亭

身名不問十年餘老大誰能更讀書林中獨酌鄰家酒

門外時聞長者車

裴迪

初與王維崔興宗俱居終南天寶後為蜀州刺史

五言絕句

宮槐陌

門前宮槐陌是向歌湖道秋來山雨多落葉無人掃

歌湖

空濶湖水廣青熒天色同艤舟一長嘯四面來清風

辛夷塢

綠堤春草合王孫自留翫況有辛夷花色與芙蓉亂

丘為

嘉興人事繼母孝常有靈芝生堂下累官太子右庶子時年八十餘而母無恙給俸祿之半及居憂

觀察使韓滉以致仕官給祿所以惠養老臣不可在喪為異唯罷春秋羊酒初還鄉縣令謁之為候門磬折令坐乃拜里胥立庭下既出乃敢坐經縣署降馬而趨卒年九十六見唐志

五言律詩

登潤州城

天末江城晚登臨客望迷春潮平島嶼殘雨隔虹蜺鳥
與孤帆遠煙和獨樹低鄉山何處是目斷廣陵西

三四
秀

孟浩然

文藝傳云字浩然襄陽人隱鹿門山四十遊京師嘗於太學賦詩一座嗟伏張九齡為荊州辟

置於府開元末病疽背卒王維過郢州畫浩然像於刺史亭因曰浩然亭鄭誠更署曰孟亭

孟浩然才氣清高蘊藉殊少觀其歌詠此中底裏已略盡矣

五言古詩

雲門寺西六七里聞符公蘭若最幽與薛八同

往

謂予獨迷方逢子亦在野結交指松柏問法尋蘭若小
谿劣容舟怪石屢驚馬所居最幽絕所住皆靜者雲簇
興座隅天空落階下以上二句一作密篠夾路傍清泉流舍下上人亦何閒
塵念俱已捨四禪合真如一切是虛假願承甘露潤喜
得惠風灑依止此山門誰能效丘也

小溪二語
瘦骨欲秀

宿業師山房待丁公不至

夕陽度西嶺羣壑修已暝松月生夜涼風泉滿清聽樵
人歸欲盡煙鳥栖初定之子期宿來孤琴候蘿逕

三四
幽趣

七言古詩

鸚鵡洲送王九之江左

昔登江上黃鶴樓遙愛江中鸚鵡洲洲勢逶迤環碧流
鴛鴦灘鵝滿灘頭灘頭日落沙磧長金沙熠燿動飈光
舟人牽錦纜浣女結羅裳月明全見蘆花白風起遙聞

杜若香君行采采莫相忘

體輕

可舞

夜歸鹿門歌

山寺鳴鐘晝已昏
漁陽渡頭爭渡喧
人隨沙路向江村
余亦乘舟歸鹿門
月照開煙樹忽到
龐公棲隱處
巖扉松徑長寂寥
惟有幽人夜來去

五言律詩

與諸子登峴山作

人事有代謝往來成古今江山留勝跡我輩復登臨水
落魚梁淺天寒夢澤深羊公碑尚在讀罷淚沾襟

清超 孟浩然李太白俱以古
行律故多率意一往不為律束

望洞庭湖贈張丞相

八月湖水平涵虛混太清氣蒸雲夢澤波撼岳陽城欲
濟無舟楫端居恥聖明坐觀垂釣者空有羨魚情

渾渾不落邊際 三四愜當渾若天成 襄陽律
詩雄渾渾則有氣蒸雲夢澤波撼岳陽城清微則有
微雲澹河漢疎雨滴梧桐精策則有就枕滅明燭
扣舷聞夜漁間雅則有衆山遥對酒孤嶼共題詩

與杭州薛司戶登梓亭樓作

梓亭樓一作梓亭驛

水樓一登眺半出青林高
帶幕英僚敞芳筵下客叨
山藏伯禹穴城壓伍胥濤
今日觀溟漲垂綸欲釣鰲

五六形勝不容復過

遊鳳林寺西嶺

共喜年華好來遊
水石間煙容開遠樹
春色滿幽山
壺酒朋情洽琴歌野興閒
莫愁歸路暝招月伴人還

三四語境開遠絕無纖氣

尋梅道士

彭澤先生柳山陰道士驚我來從所好停策夏雲多重
以觀魚樂因之鼓枻歌崔徐迹未朽千載揖清波

題大禹寺義公房

義公習禪處結構依空林戶外一峰秀堦前衆壑深夕
陽連雨足空翠落庭陰看取蓮花淨應知不染心

三四景色入手構結
天成五六色秀

尋白鶴巖張子容隱居

白鶴青巖半幽人有隱居階庭空水石林壑罷樵漁歲
月青松老風霜苦竹疎覩茲懷舊業迴策返吾廬

三四
韵高

裴司士員司戶見尋

士一作功
戶一作士

府僚能枉駕家醞復新開落日池上酌清風松下來厨
人具雞黍稚子摘楊梅誰道山公醉猶能騎馬回

晚春

二月湖水清家家春鳥鳴林花掃更落徑草踏還生酒

伴來相命開樽共解醒當杯已入手歌妓莫停聲

三四

輕倩

寒夜張明府宅宴

瑞雪初盈尺寒宵始半更列筵邀酒伴刻燭限詩成香
炭金爐煖嬌絃玉指清厭厭不覺醉歸路曉霞生

三四渾成
若無故實

和張明府登鹿門作

忽示登高作能寬旅寓情絃歌既多暇山水思彌清草

得風先動虹因雨後成謬承巴里和非敢應同聲

律中不意

五六出此

秋日陪李侍御渡松滋江

南紀西江濶皇華御史雄截流寧假楫挂席自生風僚
宋爭攀鷁魚龍亦避驄坐聽白雪唱翻入棹歌中

六句
意巧

永嘉上浦館逢張八子容

逆旅相逢處江村日暮時衆山遙對酒孤嶼共題詩解

金公曰卷十一
卷十一
宇鄰蛟室人煙接島夷鄉園萬餘里失路一相悲

酬李少府見贈

養疾衡茅下由來浩氣真五行將禁火十步想尋春致
敬惟桑梓邀歡即故人迴看後彫色青翠有松筠

宿桐廬江寄廣陵舊遊

山暝聽猿愁滄江急夜流風鳴兩岸葉月照一孤舟建
德非吾土維揚憶舊遊還將數行淚遙寄海西頭

三四意象逼削一
孤舟畢竟多一字

宿武陽即事

川暗夕陽盡孤舟泊岸初
嶺猿相叫嘯潭影似空虛
就枕滅明燭扣舷聞夜漁
雞鳴問何處人物是秦餘

他鄉七夕

他鄉逢七夕旅館益羈愁
不見穿針婦空懷故國樓
緒風初滅熱新月始登秋
誰忍窺河漢迢迢望斗牛

五六警
而清

早寒江上有懷

木落鴈南度北風江上寒我家湘水曲遙隔楚雲端鄉
淚客中盡孤帆天際看迷津欲有問平海夕漫漫

一起感懷略
盡下接故難

夜渡湘水

客舟貪利涉夜裏渡湘川露氣聞芳杜歌聲識采蓮榜
人投岸火漁子宿潭煙行侶時相問潯陽何處邊

送吳宣從事

才有幕中畫而無塞上勲漢兵將滅虜王粲始從軍旌

旆邊庭去山川地脈分平生一七首感激贈夫君

一起是
得意語

留別王侍御維

寂寂竟何待朝朝空自歸
欲尋芳草去惜與故人違
當路誰相假知音世所稀
祗應守寂寞還掩故園扉

留別王維與歲暮歸南山
雖無綺思不妨雅音

永嘉別張子容

舊國余歸楚新年子北征
挂帆愁海路分手戀朋情
日

夕故園意汀洲春草生何時一杯酒重與李膺傾

歲暮歸南山

北闕休上書南山歸故廬不才明主棄多病故人疎白

髮催年老青陽逼歲除永懷愁不寐松月夜牕虛

本傳云王

維私邀浩然入內署俄而玄宗至浩然匿牀下維取實對帝喜曰朕聞其人而不見也詔使出帝問其詩浩然再拜自誦此詩至不才明主棄之句帝曰卿不求仕而朕未嘗棄卿奈何誣我因放還

尋陳逸人故居

人事一朝盡荒蕪三徑休始聞漳浦卧奄作岱宗遊池

水猶含墨山雲已落秋今朝泉壑裏何處覓藏舟

池水一
語淒然

閨情

一別隔炎涼君衣忘短長裁縫無處等以意忖情量畏
瘦疑傷窄防寒更厚裝半啼封裹了知欲寄誰將

宛是閨中情緒
第嫌語太近人

附廣陵別薛八
士有不得志栖栖吳楚間廣陵相
遇罷彭蠡泛舟還檣出江中樹波連海上山風帆明
日遠何處
更追攀

附送席大 惜爾懷其實迷邦倦客遊江山歷金楚
河洛越成周道路疲千里鄉園老一丘知君命不偶

同病亦

同憂

附李氏園卧疾

我愛陶家趣園林無俗情春雷百

卉坼寒食四鄰清伏枕嗟公幹歸山羨子平年年白

社客空滯洛陽城
清字佳

五言排律

陪張丞相自松滋江東泊渚宮

放溜下松滋登舟命檝師寧忘經濟日不憚沍寒時洗
幘豈獨古濯纓良在茲政成人自理機息鳥無疑雲物

凝孤嶼江山辨四維晚來風稍急冬至日行遲獵響驚
雲夢漁歌激楚辭渚宮何處是川暝欲安之

行出東山望漢川

異縣非吾土連山盡綠篁平田出郭少盤坂入雲長萬
壑歸於漢千峰盡彼蒼猿聲亂楚峽人語帶巴鄉石上
攢椒樹藤間綴蜜房雪餘春未煖嵐解晝初陽征馬疲
登頓歸帆愛渺茫坐欣沿溜下信宿見維桑

余嘗謂律詩如切玉歌行如破竹在排律其法尤
嚴孟浩然律詩句不琢鍊格不整峙排律之體大

別於初

唐矣

五言絕句

送朱大入秦

遊人武陵去寶劍直千金分手脫相贈平生一片心

春曉

春眠不覺曉處處聞啼鳥夜來風雨聲花落知多少

喝喝懽懽絕得閨中體氣宛
是六朝之餘第骨未峭耳

七言絕句

送杜十四之江南

荆吳相接水為鄉
君去春江正淼茫
日暮征帆何處泊
天涯一望斷人腸

渡浙江問舟中人

潮落江平未有風
扁舟共濟與君同
時時引領望天末
何處青山是越中

唐詩鏡卷十一

欽定四庫全書

唐詩鏡卷十二

明 陸時雍 編

盛唐第四

王昌齡

新唐書云字少伯江寧人第進士補秘書郎又中宏詞科遷汜水尉不護細行貶龍標尉世亂還鄉為刺史閭丘曉所殺其詩緒密而思清時謂王江寧云

五言古詩

聽彈風入松關贈楊補闕

商風入我絃夜竹深有露絃悲與林寂清景不可度寥
落幽居心颺颺青松樹松風吹草白谿水寒日暮聲意
去復還九變一作辨待一顧空山多雨雪獨立君始悟

維氏尉沈興宗置酒南谿留贈

林色與谿古深篁引幽翠山樽在漁舟棹月情已醉始
窮清源口壑絕人境異春泉滴空崖萌草拆陰地久之
風榛寂遠聞樵聲至海鴈時獨飛永然滄洲意古時青
冥客滅跡淪一尉吾子躊躇心豈其紛埃事維峯信所

赴濟北余乃遂齊物意已會息肩理猶未卷舒形性表脫
畧賢哲議仲月期角巾飯僧嵩陽寺

昌齡五言古氣骨
道峻意趣未寫

酬鴻臚裴主簿雨後北樓見贈

暮霞照新晴歸雲猶相逐有懷晨昏暇想見登眺目問
禮侍彤襜題詩訪茅屋高樓多古今陳事滿陵谷地久
微子封臺餘孝王築徘徊顧霄漢豁達俯川陸遠水對
孤城長天向喬木公門何清靜列戟森已肅不歎攜手

稀常思著鞭速終當拂羽翰輕舉隨鴻鵠

觀江淮名勝圖

刻意吟雲山尤知隱淪妙遠公何為者再詣臨海嶠而
我高其風披圖得遺照援毫無逃境遂展千里眺淡掃
荆門煙明標赤城燒青葱林間嶺隱見淮海徼但指香
爐頂無聞白猿嘯沙門既云滅獨往豈殊調感對懷拂
衣胡寧事漁釣安期始遺舄千古謝榮耀投跡庶可齊
滄浪有孤棹

灞上閒居

鴻都有歸客偃卧滋陽村
軒冕無枉顧清川照我門
空林網夕陽寒鳥赴荒園
廓落時得意懷哉莫與言
庭前有孤鶴欲啄常翩翩
翻為我銜素書弔彼顏與原
二君既不朽所以慰其魂

七言古詩

箜篌引

盧谿郡南夜泊舟
夜聞兩岸羌戎謳
其時月黑猿啾啾

微雨霑衣令人愁有一遷客登高樓不言不寐彈箏篴
彈作薊門桑葉秋風沙颯颯青塚頭將軍鐵驄汗血流
深入匈奴戰未休黃旗一點兵馬收亂殺胡人積如丘
瘡病驅來役邊州仍披漠北羔羊裘顏色饑枯掩面羞
眼眶淚滴深兩眸思還本鄉食羶牛欲語不得指咽喉
或有強壯能咿嘍意說被他邊將讐五世屬藩漢主留
碧毛氍帳河曲遊索駝五萬部落稠敕賜飛鳳金兜鍪
為君百戰如過籌靜掃陰山無鳥投家藏鐵券特承優

黃金千斤不稱求九族分離作楚囚深谿寂寞絃苦幽
草木悲感聲颼颼僕本東山為國憂明光殿前論九疇
簾讀兵書盡冥搜為君掌上施權謀洞曉山川無與儔
紫宸詔發遠懷柔搖筆飛霜如奪鉤鬼神不得知其由
憐愛蒼生比虬蜉朔河屯兵須漸抽盡遣降來拜御溝
便令海內休戈矛何用班超定遠侯史臣書之得已不

城傍曲

秋風鳴桑條草白狐兔驕邯鄲飲來酒未消城北原平

掣皂雕射殺空營兩騰虎迴身却月佩弓消

五言律詩

胡笳曲

城南虜已合一夜幾重圍自有金笳引能霑出塞衣聽
臨關月苦清入海風微三奏高樓曉胡人掩涕歸

附萬歲樓江上巍巍萬歲樓不知經歷幾千秋年
喜見山長在日日悲看水獨流猿猴何曾離暮嶺
鷓鴣空自泛寒洲誰堪登望雲煙裏向晚茫茫
發旅愁等詩殊屬浪然三四悲喜有何定際

五言絕句

送郭司倉

映門淮水綠留騎主人明
明月隨良掾春潮夜夜深

送李十五

怨別秦楚深江中秋雲起
天長杳無隔月影在寒水

七言絕句

從軍行

烽火城西百尺樓黃昏獨坐
海風秋更吹羌笛關山月
無那金閨萬里愁

烽火城西百尺樓一絕黃昏獨坐一絕海風秋一絕
更吹羌笛關山月一絕無那金閨萬里愁一絕
昌齡作絕句往往襲積其意故覺其情之深長而
辭之飽快也人解後二語謂從軍者聞羌笛而起
金閨之思非也蓋因邊城聞笛而代為金閨之愁
耳言已之愁已不堪而閨中之愁更將何奈此昌
齡詩法不與衆同也

琵琶起舞換新聲總是關山離別情
撩亂邊愁聽不盡
高高秋月照長城

青海長雲暗雪山孤城遙望玉門關
黃沙百戰穿金甲
不破樓蘭終不還

大漠風塵日色昏
紅旗半捲出轅門
前軍夜戰洮河北
已報生擒吐谷渾

出塞

秦時明月漢時關
萬里長征人未還
但使龍城飛將在
不教胡馬度陰山

秦時明月漢時關懷古情深隱復自負後二語其
意顯然可見因知秦征漢戰勒銘著績能有幾人

騶馬新跨白玉鞍
戰罷沙場月色寒
城頭鐵鼓聲猶振
匣裏金刀血未乾

春宮曲

昨夜風開露井桃，未央前殿月輪高。
平陽歌舞新承寵，簾外春寒賜錦袍。

他人說賜錦袍決不疊上春寒二字，即說春寒決不疊上簾外二字，只四字便備極情色。

西宮春怨

西宮夜靜百花香，欲捲珠簾春恨長。
斜抱雲和深見月，朦朧樹色隱昭陽。

欲捲珠簾一舒遠望，然則捲之已耳，而春恨深長，所以欲捲而復已也。下云深見月以知珠簾之不

掩也然則已不掩矣而不能自己於長望欲望則亦一望之已耳而斜抱雲和者何蓋雲和本以釋愁而彈不成聲故抱也所以不去雲和者意在故也曰抱又曰斜抱意態描寫曲盡

西宮秋怨

芙蓉不及美人妝
水殿風來珠翠香
却恨含情掩秋扇

空懸明月待君王

却恨含情掩秋扇一語三折夫情之不能已也却自恨其含情而掩秋扇掩之者以不忍見也既自恨其含情矣而終不能已於情所以懸月以相待而又自笑其空為此舉也詩人下字之妙此一懸字誰為懸之此須人自領會

長信秋詞

金井梧桐秋葉黃
珠簾不捲夜來霜
熏籠玉枕無顏色
卧聽南宮清漏長

奉帚平明金殿開
且將團扇暫徘徊
玉顏不及寒鴉色
猶帶昭陽日影來

暫徘徊三字有意不云錦帳寒恩而
第曰昭陽日影此長信宮中人語

真成薄命久尋思
夢見君王覺後疑
火照西宮知夜飲
分明複道奉恩時

青樓曲

白馬金鞍從武皇
旌旗十萬宿長楊
樓頭小婦鳴箏坐
遙見飛塵入建章

閨怨

閨中少婦不曾愁
春日凝妝上翠樓
忽見陌頭楊柳色
悔教夫婿覓封侯

所云兒

女情深

甘泉歌

乘輿執玉已登壇
細草霑衣春殿寒
昨夜雲生拜初月
萬年甘露水晶盤

深情點禱
喁喁吟吟

觀獵

角鷹初下秋草稀
鐵驄拋鞍去如飛
少年獵得平原兔
馬上橫捎意氣歸

寄穆侍御出幽州

一從恩譴度瀟湘
塞北江南萬里長
莫道薊門書信少

鴈飛猶得到衡陽

西江寄越弟

南浦逢君嶺外還
沅谿更遠洞庭山
堯時恩澤如春雨
夢裏相逢同入關

李四倉曹宅夜飲

霜天留後故情歡
銀燭金爐夜不寒
欲問吳江別來意
青山明月夢中看

聽流人水調子

孤舟微月對楓林分付鳴笳與客心
嶺色千重萬重雨
斷絃收與淚痕深

後二語倒裝故格高句老分付字與字
收字俱妙絃何以遽斷以不勝淒怨故

梁苑

梁園秋竹古時煙城外風悲欲暮天
萬乘旌旗何處在
平臺賓客有誰憐

送魏二

醉別江樓橘柚香江風引雨入船涼
憶君遙在瀟湘月

愁聽清猿夢裏長

代為之思
其情更遠

別李浦之京

故園今在灞陵西
江畔逢君醉不迷
小弟鄰莊尚漁獵
一封書寄數行啼

送薛大赴安陸

津頭雲雨暗湘山
遷客離憂楚地顏
遙送扁舟安陸郡
天邊何處穆陵關

望不見
愁漫漫

芙蓉樓送辛漸二首

寒雨連天夜入湖
平明送客楚山孤
洛陽親友如相問
一片冰心在玉壺

丹陽城南秋海陰
丹陽城北楚雲深
高樓送客不能醉
寂寂寒江明月心

寒雨連天丹陽城南兩首後二語別有深情平
明送客楚山孤孤字自作一語
鍊格最高

重別李評事

莫道秋江離別難
舟船明日是長安
吳姬緩舞留君醉
隨意青楓白露寒

隨意青楓白露寒
寒字聲色貴
吳將吳姬緩舞映出幾許佳處

別陶副使歸南海

南越歸人夢海樓
廣陵新月海亭秋
寶刀留贈長相憶
當取戈船萬戶侯

送人歸江夏

寒江綠水楚雲深
莫道離憂遷遠心
曉夕雙帆歸鄂渚

愁將孤月夢中尋

月明魂往夢裏分明
末句遣言結意之妙

盧谿別人

武陵谿口駐扁舟
谿水隨君向北流
行到荊門上三峽

莫將孤月對猿愁

孤月對猿愁是一佳句
莫將孤月對猿愁又是一妙語

送程六

冬夜傷離在五谿
青魚雪落鱸橙蘢
武岡前路看斜月

片片舟中雲向西

別辛漸

別館蕭條風雨寒
扁舟月色渡江看
酒酣不識關西道
却望春江雲尚殘

送鄭判官

東楚吳山驛樹微
輶車銜命奉恩輝
英僚攜出新豐酒
半道遙看驄馬歸

送姚司法歸吳

吳掾留觴楚郡心
洞庭秋雨海門陰
但令意遠扁舟近
不道滄江百丈深

意遠於路
情深於江

送柴侍御

沅水通波接武岡
送君不覺有離傷
青山一道同雲雨
明月何曾是兩鄉

盧象

字緯卿汶水人開元中由前進士補秘書郎張九齡深器之擢左補闕名盛氣高少所卑下為飛語

所中左遷齊汾鄭三郡司馬入為膳部員外受祿山偽官貶永州司戶起為主客員外道病留武昌卒

五言律詩

雜詩

家居五原上征戰是平生
獨負山西勇誰當塞下名
死生遼海戰雨雪薊門行
諸將封侯盡論功獨不成

唐詩鏡卷十二

欽定四庫全書

唐詩鏡卷十三

明陸時雍編

盛唐第五

高適

本傳云字達夫渤海人少濩落不事生產年過五十始留意詩什每吟一篇已為好事者稱誦舉有

道科授封丘尉哥舒翰表為左驍騎兵曹掌書記祿山亂拜監察御史及翰兵敗奔赴行在遷侍御史歷遷至劍南西川節度使代宗時為刑部侍郎轉散騎常侍封渤海縣侯卒諡曰忠適喜言王霸大略務功名尚節義逢時多難以安危為已任有唐以來詩人之達者唯適而已

高適詩多氣骨然粗氣不除其最佳
者在七言古詩脫盡常格獨出本色

五言古詩

塞上

東出盧龍塞浩然客思孤亭堠列萬里漢兵猶備胡邊
塵漲北溟虜騎正南驅轉鬪豈長策和親非遠圖惟昔
李將軍按節臨此都總戎掃大漠一戰擒單于常懷感
激心願效縱橫謨倚劍欲誰語關河空鬱紆

未得
通勁

酬龐十兵曹

憶昔遊京華自言生羽翼懷書訪知己末路空相識許
國不成名還家有慙色託身從畝畝浪跡初自得雨澤
感天時耕耘忘帝力同人洛陽至問我睢水北遂爾歎
津涯淨然見胸臆高談懸物象逸韻投翰墨別岸迴無
垠海鶴鳴不息梁城多古意攜手共悽惻懷賢想鄒枚
登高思荊棘世情惡疵賤之子憐孤直酬贈感并深離
憂豈終極

許國不成名還家有慙色託身從歛浪跡
初自得摠寫得佳懷賢一段覺此表未暢

酬秘書弟蕪寄幕下諸公

并序

乙亥歲適徵詣長安時侍御楊公任通事舍人詩書
起予蓋終日矣今年適自封丘尉統吏卒於青夷途
經博陵得太守賈公之政相見如舊他日之意存焉
司業張侯周旋迨茲僅三十載將疇昔是好匪窮達
之異乎族弟秘書鴈序之白眉者風塵一別俱東西
南北之人愴然相逢適與願契旅館之暇長懷益增

因賦是詩愧非六義之流也

亞相膺時傑羣才遇良工翩翩幕下來拜賜甘泉宮信
知命世奇適會非常功侍御執邦憲清詞煥春叢末路
望繡衣他時常發蒙孰云三軍壯懼我彈射雄誰謂萬
里遙在我樽俎中光祿經濟器精微自深衷前席屢榮
問長城兼在躬高蹤激頽波逸翮馳蒼穹將副節制籌欲
令沙漠空司業志應徐雅度思沖融相思三十年憶昨
猶兒童今來抱青紫忽若披鵠鴻說劍增慷慨論交持

始終秘書即吾門虛白無不通多才陸平原碩學鄭司
農獻封到關西獨步歸山東永意久知處嘉言能亢宗
客從梁宋來行役隨轉蓬酬贈欣元弟憶賢瞻數公游
鱗戲滄浪鳴鳳棲梧桐並負垂天翼俱乘破浪風耿耿
天府間偃仰誰敢同何意構廣厦翻然顧雕蟲應知阮
步兵惆悵此途窮

詞氣
昂昂

酬岑二十主簿秋夜見贈之作

舍下蛩亂鳴居然自蕭索緬懷高秋興忽枉清夜作感
物我心勞涼風驚二毛池空菡萏死月出梧桐高如何
異鄉縣復得交才彥汨沒嗟後時蹉跎相見箕山別
來久魏闕誰不戀獨有江海心悠悠未嘗倦

宛轉快絕月出梧
桐高一語景色

送韓九

惆悵別離日徘徊岐路前歸人望獨樹匹馬隨秋蟬常
與天下士許君兄弟賢良時正可用行矣莫徒然

三四老氣橫
絕下句更勝

宋中遇林慮楊十七山人因而有別

昔余涉漳水，驅車行鄴西。
遙見林慮山，蒼蒼夏天倪。
邂逅逢爾曹，說君彼巖棲。
蘿徑垂野蔓，石房倚雲梯。
秋韭何青青，藥苗數百畦。
栗林隘谷口，枯樹森迴谿。
耕耘有山田，紡績有山妻。
人生苟如此，何必組與珪。
誰能遠相訪，曩情殊不迷。
簷前舉醇醪，竈下烹隻雞。
朔風忽振蕩，昨夜寒螿啼。
遊子益思歸，罷琴傷解攜。
出門盡原野，白

日黯已低始驚道路難終念言笑睽因聲謝岑壑歲暮
一攀躋

味腴色老
不愧名士

睢陽酬別暢大判官

吾友遇知己策名逢聖朝高才擅白雪逸翰懷青霄承
詔選嘉兵慨然即馳軺清晝下公館尺書忽相邀留歡
惜別離畢景駐行鑣言及沙漠事益令胡馬驕大夫拔
東蕃聲冠霍嫖姚兕螯衝矢石鐵甲生風颭諸將出井

陘連營濟石橋酋豪盡俘馘子弟輸征徭邊庭絕刁斗
戰地成漁樵榆關夜不扃塞口長蕭蕭降胡滿薊門一
一能射鵬軍中多宴樂馬上何輕趨戎狄本無厭羈縻
非一朝饑附誠足用飽飛安可招李牧制儋藍遺風豈
寂寥君還謝幕府慎勿輕畱莧

言之
侃侃

宴韋司戶山亭院

人幽想靈山意愜憐遠水習靜務為適所居還復爾汲

流漲華池開酌宴君子苔逕試窺踐石屏可攀倚入門
見中峯攜手如萬里橫琴了無事垂釣應有以高館何
沈沈颯然涼風起

同薛司直諸公秋霽曲江俯見南山作

南山鬱初霽曲江湛不流若臨瑤池前想望崑崙丘迴
首見黛色眇然波上秋深沈俯崢嶸清淺延阻修連潭
萬木影挿岸千巖幽杳靄信難測淵淪無暗投片雲對
漁父獨鳥隨虛舟我心寄青霞世事慙白鷗得意在乘

興忘懷非外求良辰自多暇欣與數子遊

片雲對漁父獨鳥
隨虛舟語最不老

登廣陵棲靈寺塔

淮南富登臨茲塔信奇竒直上造雲族憑虛納天籟迴
然碧海西獨立飛鳥外始知高興盡適與賞心會連山
黯吳門喬木吞楚塞城池滿牕下物象歸掌內遠思駐
江帆暮情結春靄軒車疑蠢動造化資大塊何必了無
身然後知所退

同韓四薛三東亭翫月

遠遊悵不樂茲賞吾道存歎曲故人意辛勤清夜言東
亭何寥寥佳境無朝昏堦墀近洲渚戶牖當郊原矧乃
窮周旋游時怡討論樹陰蕩瑤瑟月氣延清樽明河帶
飛鴈野火連荒村對此更愁予悠哉懷故園

樹陰四語

秀色鬱鬱

李雲南征蠻詩

并序

天寶十一載有詔伐西南夷右相楊公兼節制之寄

乃奏前雲南太守李宓涉海自交趾擊之道路險艱
往復數萬里蓋百王所未通也十二載四月至於長
安君子是以知廟堂使能而李公効節適忝斯人之
舊因賦是詩

聖人赫斯怒詔伐西南戎肅穆廟堂上深沈節制雄遂
令感激士得建非常功料死不料敵顧恩寧顧終鼓行
天海外轉戰蠻夷中梯巖近高鳥穿林經毒蟲鬼門無
歸客北戶多南風蜂蠆隔萬里雲雷隨九攻長驅大浪

破急擊羣山空餉道忽已遠懸軍垂欲窮精誠動白日
憤薄連蒼穹野食掘田鼠晡餐兼燹僮收兵列亭堠拓
地彌西東臨事恥苟免履危能飭躬將星獨照耀邊色
何溟濛瀘水夜可涉交州今始通歸來長安道名見甘
泉宮廉藺若未死孫吳知暗同相逢論意氣慷慨謝深
衷

微帶
古色

自淇涉黃河途中作

秋日登滑臺臺高秋已暮獨行既未愜懷土悵無趣晉
宋何蕭條羌胡散馳騫當時無戰略此地即邊戍兵革
徒自勤山河孰云固乘閒喜臨眺感物傷遊寓惆悵落
日前飄飄遠帆處北風吹萬里南鴈不知數歸意方浩
然雲沙更迴互

末四語感物語致
落落嬰懷殊深

七言古詩

行路難二首

長安少年不少錢，能騎駿馬鳴金鞭。
五侯相逢大道邊，美人絃管爭留連。
黃金如斗不敢惜，片言如山莫棄捐。
安知顧願讀書者，暮宿靈臺私自憐。

君不見富家翁，昔時貧賤誰比數。
一朝金多結豪貴，百事勝人健如虎。
子孫成行滿眼前，妻能管絃妾歌舞。
自矜一身忽如此，却笑傍人獨愁苦。
東鄰少年安所如，席門窮巷出無車。
有才不肯學干謁，何用年年空讀書。

絕有氣格有才不肯學干謁何
用年年空讀書丈夫骨體語

古大梁行

古城莽蒼饒荆榛驅馬荒城愁殺人魏王宮觀盡禾黍
信陵賓客隨灰塵憶昨雄都舊朝市軒車照耀歌鐘起
軍容帶甲三十萬國步連衡五千里全盛須臾那可論
高臺曲池無復存遺墟但有狐狸迹古地空餘草木根
暮天搖落傷懷抱撫劍悲歌對秋草俠客猶傳朱亥名
行人尚識夷門道白壁黃金萬戶侯寶刀駿馬填山丘
年代淒涼不可問往來唯見水東流

辭色
亦振

邯鄲少年行

邯鄲城南游俠子自矜生長邯鄲裏
千場縱博家仍富
幾處報讎身不死
宅中歌笑日紛紛
門外車馬如雲屯
未知肝膽向誰是
令人却憶平原君
君不見今人交態
薄黃金用盡還疎索
以茲感歎辭舊遊
更於時事無所
求且與少年飲美酒
往來射獵西山頭

千場縱博家仍富幾處報讎身不死此二語甚為
少年生色未知肝膽向誰是令人却憶平原君感

慨欲絕後語俱肝膽披寫
標格挺挺有五陵裘馬意致

燕歌行

并序

開元二十六年客有從御史大夫張公出塞而還者
作燕歌行以示適感征戍之事因而和焉

漢家煙塵在東北漢將辭家破殘賊男兒本自重橫行
天子非常賜顏色縱金伐鼓下榆關旌旆遠迤碣石間
校尉羽書飛瀚海單于獵火照狼山山川蕭條極邊土
胡騎憑陵雜風雨戰士軍前半死生美人帳下猶歌舞

大漠窮秋塞草腓孤城落日鬪兵稀
身當恩遇常輕敵力盡關山未解圍
鐵衣遠戍辛勤久玉筋應啼別離後
少婦城南欲斷腸征人薊北空回首
邊庭飄颻那可度絕域蒼茫無所有
殺氣三時作陣雲寒聲一夜傳刁斗
相看白刃血紛紛死節從來豈顧勲
君不見沙場征戰苦至今猶憶李將軍

戰士軍前半死生美人帳下猶歌舞
語意警絕高適七言古多句調琅琅振響欲絕

人日寄杜二拾遺

人日題詩寄草堂遙憐故人思故鄉柳條弄色不忍見
梅花滿枝空斷腸身在南蕃無所預心懷百憂復千慮
今年人日空相憶明年人日知何處一卧東山三十春
豈知書劍老風塵龍鍾還忝二千石愧爾東西南北人

語多合拍雖無
他奇故是可咏

送別

昨夜離心正鬱陶三更白露西風高螢飛木落何淅瀝
此時夢見西歸客曙鐘寥亮三四聲東鄰嘶馬使人驚

攬衣出戶一相送唯見歸雲縱復橫

隨手得句不主故常
末二語甚有情色

贈別晉三處士

有人家住清河源渡河問我遊梁園手持道經注已畢
心知內篇口不言盧門十年見秋草此心惆悵誰能道
知己從來不易知慕君為人與君好別時九月桑葉疎
出門千里無行車愛君且欲君先達今上求賢早上書

隨情可詩隨語可詩所
謂名士能快所欲言

送渾將軍出塞

將軍族貴兵且強漢家已是渾邪王子孫相承在朝野
至今部曲燕支下控弦盡用陰山兒臨陣常騎大宛馬
銀鞍玉勒繡螭弧每逐嫖姚破骨都李廣從來先將士
衛青未肯學孫吳傳有沙場千萬騎昨日邊庭羽書至
城頭畫角三四聲匣裏寶刀晝夜鳴意氣能甘萬里去
辛勤判作一年行黃雲白草無前後朝建旌旄夕刁斗
塞下應多俠少年關西不見春楊柳從軍借問所從誰

擊劒酣歌當此時遠別無輕繞朝策平戎早寄仲宣詩

送蔡山人

東山布衣明古今自言獨未逢知音識者閱見一生事
到處豁然千里心看書學劒長辛苦近日方思謁明主
斗酒相留醉復醒悲歌數年淚如雨丈夫遭遇不可知
買臣主父皆如斯我今蹭蹬無所似看爾崩騰何若為

封丘作

我本漁樵孟諸野一生自是悠悠者乍可狂歌草澤中

寧堪作吏風塵下祇言小邑無所為公門百事皆有期
拜迎官長心欲碎鞭撻黎庶令人悲歸來向家問妻子
舉家盡笑今如此生事應須南畝田世情付與東流水
夢想舊山安在哉為銜君命且遲迴乃知梅福徒為爾
轉憶陶潛歸去來

別韋參軍

二十解書劍西遊長安城舉頭望君門屈指取公卿國
風沖融邁三五朝廷禮樂彌寰宇白璧皆言賜近臣布

衣不得干明主歸來洛陽無負郭東過梁宋非吾土兔
苑為農歲不登鴈池垂釣心長苦世人遇我同衆人唯
君於我最相親且喜百年有交態未嘗一日辭家貧彈
棊擊筑白日晚縱酒高歌楊柳春歡娛未盡分散去使
我惆悵驚心神丈夫不作兒女別臨岐涕泗沾衣巾

送田少府貶蒼梧

沈吟對遷客惆悵西南天昔為一官未得意今向萬里
令人憐念茲斗酒成睽間停舟歎君日將晏遠樹應憐

北地春行人却羨南歸鴈丈夫窮達未可知看君不合
長數竒江山到處堪乘興楊柳青青那足悲

賦得還山吟送沈四山人

還山吟天高日暮寒山深送君還山識君心人生老大
須恣意看君解作一生事山間偃仰無不至石泉淙淙
若風雨桂花松子常滿地賣藥囊中應有錢還山服藥
又長年白雲勸盡杯中物明月相隨何處眠眠時憶問
醒時事夢魂可以相周旋

淙淙如
石上泉

崔司錄宅燕大理李卿

多雨殊未已秋雲更沈沈
洛陽故人初解印山東小吏
來相尋上卿才大名不朽
早朝至尊暮求友豁達常推
海內賢殷勤但酌樽中酒
飲醉欲言歸剡谿門前駟馬
光照衣路傍觀者徒唧唧
我公不以為是非

同鮮于洛陽於畢員外宅觀畫馬歌

知君愛鳴琴仍好千里馬
永日恒思單父中有時心到

宛城下遇客丹青天下才白生胡雛控龍媒主人娛賓
畫障開只言騏驎西極來半壁趨趨勢不住滿堂風飄
颯然度家僮愕視欲先鞭握馬驚嘶還屢顧始知物妙
皆可憐燕昭市駿豈徒然縱令翦拂無所用猶勝駑駘
在眼前

善作
解語

見薛大臂鷹作

寒楚十二月蒼鷹八九毛寄言燕雀莫相啁自有雲霄

萬里高

詠馬鞭

龍竹養根凡幾年
工人截之為長鞭
一節一目皆天然
珠重重星連連繞指柔
純金堅繩不直規
不圓把向空中捎一聲
良馬有心日馳千

初唐七古多作偶語絕句故情既不宜勢復不暢
雖以楊炯駱賓王之才而帝京篇長安古意終為
體勢所局中唐七古蕩逸遊行
縱橫揮霍駸駸乎大雅之章矣

五言律詩

部落曲

蕃軍傍塞遊代馬噴風秋老將垂金甲關支著錦裘
瑯戈蒙豹尾紅旆挿狼頭日暮天山下鳴笳漢使愁

語色
欲稱

附醉後贈張九旭 世上漫相識此翁殊不然興來
書自聖醉後語尤顛白髮老間事青雲在目前牀頭
一壺酒能更幾回眠 有好意嫌於詞率律詩須得
琢鍊精工雖有長材何容率意但琢鍊而不見其迹
所為融
化極矣

附廣陵別鄭處士 落日知分手春風莫斷腸興來
無不愜才在亦何傷谿水堪垂釣江田耐挿秧人生

只為此亦
足傲羲皇

附送劉評事充朔方判官賦得征馬嘶
征馬向邊
州蕭蕭嘶不休思深應帶別聲斷為蕪秋
岐路風將
遠關山月共愁贈君從此去何
日大刀頭三四來得苦氣

附送鄭侍御謫閩中
謫去君無恨閩中我舊過大
都秋鴈少只是夜猿多東路雲山合南天瘴癘和自
當逢雨露行矣慎風波三四語尖
又不及鳥道一千里猿啼十二時

七言律詩

東平別前衛縣李宋少府

黃鳥翩翩楊柳垂春風送客使人悲
怨別自驚千里外

論交却憶十年時
雲開汶水孤帆遠
路繞梁山匹馬遲
此地從來可乘興
留君不住益淒其

不堪

整策

夜別韋司士

得城字

高館張燈酒復清
夜鐘殘月鴈歸聲
只言啼鳥堪求侶
無那春風欲送行
黃河曲裏沙為岸
白馬津邊柳向城
莫怨他鄉暫離別
知君到處有逢迎

語致流利三四托情亦佳沙為岸柳向城有何情思若景中無情此語便不必得詩家作用馳騁

易而整頓難高適七言古往來如意聲調激揚
至七言律便覺意格墮落知律之束人多矣

附重陽節物驚心兩鬢華東籬空繞未開花百年
將半仕三巴五畝就荒天一涯豈有白衣來剝啄一
從烏帽自歌斜真成獨坐
空搔首門柳蕭蕭噪暮鴉

附送李少府貶峽中王少府貶長沙嗟君此別意
何如駐馬銜杯問謫居巫峽啼猿數行淚衡陽歸鴈
幾封書青楓江上秋天遠白帝城邊古木
疎聖代即今多雨露暫時分手莫躊躇

五言排律

信安王幕府詩

并序

開元二十年國家有事林胡詔禮部尚書信安王總

戎大舉時考功郎中王公勲郎中劉公主客郎中
魏公侍御史李公監察御史崔公咸在幕府詩以頌
美數公見於詞凡三十韻

雲紀軒皇代星高太白年廟堂咨上策幕府制中權盤
石藩維固昇壇禮樂先國章榮印綬公服貴貂蟬樂善
旌深德輸忠格上玄剪桐光寵錫題劒美貞堅聖祚雄
圖廣師貞武德虔雷霆七校發旌旆五營連華省徵羣
又霜臺舉二賢豈伊公望遠曾是茂才遷並秉韜鈴術

兼該翰墨筵帝思麟閣像臣獻柏梁篇振玉登遼甸縱
金歷薊墟度河飛羽檄橫海泛樓船北伐聲逾邁東征
務以專講戎喧洳野料敵靜居延軍勢持三略兵戎自
九天朝瞻授鉞去時聽偃戈旋大漠風沙裏長城雨雪
邊雲端臨碣石波際隱朝鮮夜壁衝高斗寒空駐綵旃
倚弓玄兔月飲馬白狼川庶物隨交泰蒼生解倒懸四
郊增氣象萬里絕風煙關塞鴻勲著京華甲第全落梅
橫吹後春色凱歌前直道常兼濟微才獨棄捐曳裾誠

已矣投筆尚悽然作賦同元淑能詩匪仲宣雲霄不可
望空欲仰神仙

語語
整策

送柴司戶充劉卿判官之嶺外

嶺外資雄鎮朝端寵節旄月卿臨幕府星使出詞曹海
對羊城濶山連象郡高風霜驅瘴癘忠信涉波濤別恨
隨流水交情脫寶刀有才無不通行矣莫徒勞

忠信涉波濤
語最簡鍊

陪竇侍御泛靈雲池

白露時先降清川思不窮
江湖仍塞上舟楫在軍中
舞換臨津樹歌饒向迴風
夕陽連積水邊色滿秋空
乘興宜投轄邀歡莫避驄
誰憐持弱羽猶欲伴鷗鴻

附奉酬睢陽李太守
公族稱王佐朝經允帝求
本枝彊我李盤石冠諸劉
禮樂光輝盛山河氣象幽
系高周柱史名重晉陽秋
華省膺推擇青雲寵宴遊
握蘭多具美前席有嘉謀
賦得黃金賜言皆白璧酬
著鞭驅駟馬操刀解全牛
出鎮兼方伯承家復列侯
朝瞻孔北海時用杜荊州
廣固纔登陟毘陵忽阻修
三台冀入夢四岳尚分憂
郡邑連京口山川望石頭
海門當建節江路引鳴騶
俗見中興理人逢至道休
先

移白額橫更息赭衣偷梁國歌來晚徐方怨不留豈
伊齊政術將以變澆浮訟簡知能吏刑寬察要囚坐
堂風偃草行縣雨隨輶地是蒙莊宅城遺闕伯丘孝
王餘井徑微子故田疇冬至招搖轉天寒蟬收猿
巖飛雨雪兔苑落梧楸列戟霜侵戶褰帟月在鈎好
賢常解榻乘輿每登樓逸足橫千里高談注九流詩
題青玉案衣贈黑貂裘窮巷軒車靜閒齋耳目愁未
能方管樂翻欲慕巢由講德良難敵觀風豈易儔寸
心仍有適江
海一扁舟

五言絕句

詠史

尚有綈袍贈應憐范叔寒不知天下士猶作布衣看

田家春望

出門何所見春色滿平蕪可歎無知己高陽一酒徒

七言絕句

別董大二首

十里黃雲白日曛北風吹鴈雪紛紛莫愁前路無知己
天下誰人不識君


六翮飄飄私自憐一離京洛十餘年丈夫貧賤應未足
今日相逢無酒錢

除夜作

旅館寒燈獨不眠
客心何事轉悽然
故鄉今夜思千里

霜鬢明朝又一年

思一作人



唐詩鏡卷十三